

ՍՓՅՈՒՌՔԱՀԱՅՆՐԻ ՆԵՐՖԱՂԹԸ ՍՈՎԵՏԱԿԱՆ ՀԱՅԱՍՏԱՆ

(1921—1925)

Հ. ՈՒ. ՄԵԼԻՔՍԵԹՅԱՆ

Առաջին համաշխարհային իմպերիալիստական պատերազմը և դաշնակների տիրապետութիւնը լիակատար քայքայման էին հասցրել Հայաստանը, երբ Երկրում հաղթանակեց Սովետական իշխանութիւնը:

Հայաստանի տերիտորիայում գրեթե չկար մի անկյուն, որ լցված չլինէր Արեւմտյան Հայաստանից և Թուրքիայի զանազան վայրերից եկած գաղթականներով: Երևանում, Էջմիածնում, Ալեքսանդրապոլում և այլ քաղաքներում թափառում էին տասնյակ հազարավոր որբ ու անապատան երեխաներ: Այսպիսի պայմաններում բնավ պատահական չէր, որ ամենուրեք մոլեգնում էին սովն ու հումաճարակները, որոնք օրական հարյուրավոր մարդկային կյանքեր էին տանում:

Իր գոյութեան առաջին իսկ օրերին Սովետական իշխանութիւնը ձեռնամուխ եղավ երկրում կուտակված գաղթականութեան հարցի արմատական լուծմանը և կարճ ժամանակամիջոցում Սովետական Ռուսաստանի սգնութեամբ կարգավորեց այն: Այս հանդամանքը գաղութահայութեան մեջ առաջ բերեց «դեպի տուն, դեպի հայրենիք, դեպի Հայաստան» ձգտումը: Ընդստաջելով տնօրէն Հայ աշխատավորների այդ ցանկութեանը, Սովետական կառավարութիւնը 1921 թ. վերջերին և 1922 թ. սկզբներին Հայաստան տեղափոխեց և հնարավոր ամեն ինչով ապահովեց Միջագետքում կորստյան դատապարտված ավելի քան 9000 հայ գաղթականների:

1923 թ. Վանի շրջաններից և այլ վայրերից Հայաստան ներգաղթեցին մոտ 1000 հոգի²: Սփյուռքահայերի ներգաղթը Սովետական Հայաստան մասսայական բնույթ է ստանում հատկապես 1924 թ. սկսած: Այդ շրջանում էլ ավելի են բազմապատկւում այն դիմումներն ու նամակները, որ ուղարկում էին գաղութահայերը Հայաստան ներգաղթելու բուռն ցանկութեամբ:

1923 թ. մարտի 20-ին Ալեքսանդրիայից մի խումբ հայ տարագիրներ գրում էին. «Ենթադրաբար գաղութի մեջ ապրող հայրենակիցներեն շատեր կփափագին փոխադրվիլ Խորհրդային Հայաստան իրենց ամբողջ ունեցածով, ձանձրացած ըլլալով օտարներու ծառայելիս, անոնց գյուղերը և քաղաքները շենացնելիս, մանավանդ վերջերս հայ թերթերու մեջ երևցած կարգ մը գրութիւնները Խորհրդային Հայաստանի մասին ավելի մեծ զարկ տվին այս մտածման»³:

Այս տրամադրութիւններն ու ցանկութիւնները օրըստօրե ուժեղանում էին և արձագանք գտնում հայաբնակ վայրերում՝ Սիրիա, Եգիպտոս, Հունաստան, Բուլղարիա, Ռումինիա, Ֆրանսիա, ԱՄՆ, Արգենտինա և այլուր: Նամակների ու դիմումների հեղինակները մեծ մասամբ աշխատավոր մարդիկ էին, հաճախ կիսագրագետ: Նրանց դիմումները երբեմն զարմացնում էին իրենց միամտութեամբ, բայց և միաժամանակ գրավում իրենց պարզութեամբ և անկեղծութեամբ: Դիմում էին ամեն տեսակ արհեստի ու զբաղմունքի տեր մարդիկ և յուրաքանչյուրն իր համառոտ կենսագրականից հետո հավաստիացնում էր, որ «բնու մը չպիտի ըլլա Խորհրդային կառավարութեան վրա», այլ իր ուժերով հաղորդակից կլինի շինարար աշխատանքին և օգտակար գործակից իր հայրենիքին:

1924 թ. հունվարի 9-ին Աթենքից մի հայ աշխատավոր ՀՍԽՀ Ժողկոմխորհին գրում էր. «Սրտի անսահման ուրախութեամբ այսօր կուգամ հայտնելու այն փափագը, զոր ծնունդ է առած

¹ Այդ մասին մանրամասն տե՛ս Հայկական ՍՍԻ ԳԼ «Տեղեկագիր» (հաս. դիտ). № 3, էջ 3—20:

² Տե՛ս Հայկական ՍՍԻ ՀԻԿԳԼ, ֆ. 40. 113, ց. 3, գ. 404, թ. 33—35:

³ Տե՛ս «Խորհրդային Հայաստան», 16 մարտի, 1924, № 63:

հայրենադարձ կրթիս տակ: Այդ փափաղը մեր դարավոր երազներու իրականացման արդյունքն է: Եւ ի՞նչ միայն, — Հայաստան երթալ, ուրիշ ոչինչ»¹:

1924 թ. ապրիլի 15-ին Բեյրութից մի խումբ հայ արհեստավորներ ՀՍԽՀ Ժողկոմխորհի նախագահ Լուկաշինին (Ս. Սրապիտյան) դրում են. «Փափագելով հայրենիքի հողին վերա վերաշինել մեր ավերված բույները, մենք, 4—6 ընտանիքներ՝ բազկացյալ 4—5 հոգիե յուրաքանչյուր ընտանիք և արհեստավոր՝ որպես դերձակ, կոշկակար, մշակ — յազմաճի, կառավարության վրա ունի բեռ չենք լրջալ, արդյոք պիտի արտոնեի՞ր մեր հոն դալը և ինչ ձևակերպություններ պետք է արտոնագիրը ստանալու»²:

Հայ տարագիրները, որպես օտարազգիներ, բազմաթիվ հալածանքների էին ենթարկվում պանազան կապիտալիստական երկրներում: Այսպես, բուլղարական կառավարությունը որոշել էր տեղահանել Ֆիլիպիի և Թաթար-Բազարճիկի շրջաններում հողագործությամբ զբաղվող հայերին՝ ծխախոտագործ մակեդոնացի գաղթականներին այնտեղ բնակեցնելու համար³: Առանձնապես ծանր կացության մեջ էին գտնվում Հունաստան ապաստանած հայ տարագիրները: 1923 թ. հունվարին հունական կառավարության հրատարակած օրենքով բոլոր օտարահայտակները ազատվում էին պետական ծառայությունից, գործարաններից և այլ աշխատավայրերից՝ հույն գաղթականներին աշխատանքով ապահովելու նպատակով: Հույն գաղթականներին բարեբեր վայրերում տեղավորելու համար հայերին Թրակիայից տեղափոխում էին Մակեդոնիայի և Պելոպոնեսի շրջանները: Տնտեսական ու քաղաքական անտանելի վիճակի մեջ էին դրվում քիչ թե շատ հարմար տնտեսություն ստեղծած հայ գաղթականները: Հայ որրերը նույնպես հեռացվում էին հունական քաղաքներից, և ահա Հունաստանի որրանոցների փոքրիկ մանուկները դիմելով Սովետական կառավարությանը, իրենց անվարժ գրիչներով ու մանկական թոթովանքով փորձում էին նկարագրել այն արյունոտ ուղին, որը նրանց հասցրել էր որրանոց և այն տառապանքները, որ նրանք կրում էին այդ հաստատությունների մեջ: «Տարե՛ք մեզ Հայաստան, տարե՛ք տուն», — այսպես էին եզրափակում նրանք⁴:

1924 թ. սեպտեմբերի 27-ին Հունաստանից ՀՍԽՀ Ժողկոմխորհի նախագահ Լուկաշինին հասցեագրված դիմումի մեջ Աթենքի հայոց Առաջնորդարանի Կենտրոնական վարչությունը, նկարագրելով հունահայ գաղթականության ծանր կացությունը, վերջում գրել էր. «Այս թշվառ գաղթականները իրենց սպառնացող ստույգ մահն փրկելու միակ միջոցը նկատած ենք անոնց Հայաստան փոխադրվելը: Այս եզրակացության կհասնինք մանավանդ տեսնելով գաղթականներու դեպի Հայրենի երկիր ձգտումը ու սերը և օր առաջ հոն նետվելու ջերմ փափագը»⁵:

1924 թ. մայիսի 27-ին Սալոնիկից մի խումբ արհեստավորներ և բանվորներ նամակով դիմում են Լուկաշինին Հայաստան փոխադրվելու թույլտվություն ստանալու համար: Հունիսի 28-ին, դիմումի ստանալու օրը, Լուկաշինը մակագրել է. «ուզարկել պատճեն ընկ. Շահվերդյանին»⁶. իրրև բանվորների և գործավորների առաջին հերթին վիզա տալ»:

Դիմումի հեղինակները, վերագնահատելով իրենց անցյալը և մերկացնելով արտասահմանյան հայ աշխատավորների ճակատագրի հետ դեռևս խաղացող ազգայնական-բուրժուական պարտիաների շահատակությունները, գրում էին. «սենք երկարաձիգ ու արյունոտ դարեր վերջ ողջունեցինք խորհրդային Հայաստանը և Անդրկովկասյան Միության Կարմիր ու փրկարար դրոշմը բանվորա-գյուղացիական անխորտակելի ուժով»:

Մենք մեր բովանդակ հույսը լուսո և ապագա մեր երջանկության փառահեղ աստղը Կովկասյան Կարմիր հորիզոնին վրա կտեսնենք. մեր և մեր նոր սերունդի ապագան հող, միայն հող է, որ պիտի կարենանք տեսնել: Այդտեղի գիտության նոր դարձնումներուն մեջ է, որ Ձեր շնորհիվ ու հանուն կարմիր իրավակարգին կառուցած նոր քաղաքացիներ պիտի պատրաստվին»:

Սփյուռքահայերի մի այլ խումբ Սովետական կառավարությանը ներկայացնելով հայ գաղթականների թշվառ վիճակը արտասահմանում գրել է. «...Գաղթականի ցուպը ձեռին, օտար երկիրներու տակ հուսարեկ ու գլխիկոր, գրեթե կյանք մուրացող հայության բեկորները իրենց

¹ «Քորհրդային Հայաստան», 16 մարտի, 1924, № 63:

² Հայկական ՍՍԽՀ ՆԻԿՊԱ, ֆ. 40/113, ց. 3, թ. 258, թ. 43:

³ Տե՛ս «Քորհրդային Հայաստան», 29 ապրիլի, 1924, № 96:

⁴ «Քորհրդային Հայաստան», 16 մարտի, 1924, № 63:

⁵ Հայկական ՍՍԽՀ ՆԻԿՊԱ, ֆ. 40/113, ց. 3, գ. 259, թ. 13—17:

⁶ Դ. Շահվերդյանը այդ յամանակ Կ. Պոլսում Անդրկովկասյան առևտրական-տնտեսական ներկայացուցիչն էր և ՀՍԽՀ Ժողկոմխորհի ներգաղթի լիազորը:

⁷ Հայկական ՍՍԽՀ ՆԻԿՊԱ, ֆ. 40/113, ց. 3, գ. 259, թ. 83—84:

աշխատող հատած են պատմական Արարատի ստորոտը հարություն առնող, վերածնվող Մայր Հայ-բնիքին, անշուշտ այն խոր հավատով, որ նրան իմաստուն վարիչները միշտ նկատի կունենան արտասահմանի իրենց տառապող եղբայրակիցներու ցավն ու թշվառությունը¹։

Միայն ներգաղթի մեջ տեսնելով իրենց իսկական փրկությունը, նրանք գոչում էին.

«Ներգաղթ, ներգաղթ կպոռան հայ խլյակները Բյուրավորներ անպատասպար կթափառեն ու գործ կմուրան»։

Միակ և գլխավորագույն սպեղանին ներգաղթն է, որ հնարավորություն պիտի տա բազմաթիվ շինարար բանվոր բազուկներու գործ հայթայթելու, ի փոխարեն նույնիսկ չոր հացի մը, հոգ չէ թե գաշտերու մեծ ժամանակավորապես վրաններու տակ պատասպարվելով, միայն թե մեր երկներին տակ գտնվելու մխիթարությունը ունենանք։

Մեր միակ հույսը կմնա ներգաղթը, որուն փութով իրականացման համար, պաղատագին էինդրենք ձեր ընկերական հեղինակությունը, ձեր միջամտությունը։ Ամեն օր դժբախտություն ունինք լսելու անպատմելի թշվառություններ, շվարուն և անել կացության մը մատնված ենք, հույսի միակ ակը և լույսի միակ փարոսը ներգաղթն է։

Ակրնգետ կսպասենք Ձեր ընկերական արդյունավոր պատասխանին և ներգաղթը ավետող պատվական գրությունը²։

Սովետական կառավարությունը, ընդառաջելով սփյուռքահայերի բուռն ցանկություններին, չայն չափերով կազմակերպեց նրանց հայրենադարձությունը։

1924 թ. մարտի 3-ին, ՀՍԽՀ Ժողկոմխորհի միջնորդությամբ, Անգրկենտգործկոմի նախագահությունը որոշում է կայացնում 1924—1925 թթ. ընթացքում արտասահմանից, հիմնականում Հունաստանից, Միջագետքից և Թուրքիայից, Սովետական Հայաստան ընդունել 10 000 գաղթականներ և նրանց տեղավորել Սարդարաբադի տրեկլյան մասում՝ նախօրոք այն դարձնելով ոռոգելի³։

ՀՍԽՀ Հողժողկոմատը և Ներքգործժողկոմատը կազմում են 10 000 գաղթականների փոխադրության և տեղավորման հետ կապված ծախսերի նախահաշիվը՝ 1 680 366 ռ. 06 կ. գումարով։ Այդ ծրագրին համապատասխան 1924 թ. մայիսից սկսվում է ներգաղթողների մուտքը Հայաստան՝ Բաթումի, Զուլֆայի և Մարգարայի վրայով⁴։

1924 թ. հոկտեմբերի 15-ին ՀՍԽՀ Ժողկոմխորհը քննարկում է Ներքգործժողկոմատի գեկուցումը՝ Հայաստան ներգաղթող 10 000 գաղթականների ընդունելության, տեղավորման, հողի հետ կապելու և այլ միջոցառումների մասին և որոշում այդ նպատակով լրացուցիչ գումարներ խնդրել ԱնդրՖեզերացիայի Ժողկոմխորհից և ՍՍՌՄ կառավարությունից։ Միաժամանակ առաջարկվում է լոգիստիկական և կոմունալ բանկերին՝ ներգաղթածների համար բացել երկաթաուղիներ գյուղատնտեսական գործիքներ, սերմեր և շինանյութեր ձեռք բերելու նպատակով։ Որոշվում է նաև Հողժողկոմատի ֆոնդերից Ժողկոմխորհի հաշվին շինափայտ տրամադրել նրանց՝ երկաթուղային կայարաններին մոտիկ վայրերում⁵։

Այս որոշումներին համապատասխան, 1924 թ. ընթացքում Հունաստանից, Սիրիայից, Կ. Պոլսից և այլ վայրերից երկիր ընդունվեցին 4167 գաղթականներ ու որրեր, որոնք հիմնականում տեղավորվեցին Սրեանում և Լենինականի գավառում⁶։

Սկսած 1925 թ. ներգաղթի և գաղթականության տեղափոխման-տեղավորման ուղղությամբ աշխատանքները տարվում են ավելի կազմակերպված և պլանային կարգով։ Ներգաղթի ու բնակեցման գործը կենտրոնացնելու և ուժեղ թափով առաջ տանելու համար 1925 թ. սեպտեմբերին հիմնադրվում է Ժողկոմխորհին առնթեր Աշխատավորական ներգաղթի հանձնաժողով, Ժողկոմխորհի նախագահի տեղակալ Ասր. Մոավյանի նախագահությամբ և Օ. Դուրգերյանի, Հ. Բալյանի, Ա. Սրգենկյանի, Ս. Մելիք-Հովսեփյանի ու Գ. Գողթունու անդամակցությամբ⁷։ Այդ հանձնաժողովի միջոցով լուծում էին սս-անում գաղթականությանը վերաբերող սկզբունքային խնդիրները կրող բոլոր հարցերը, իսկ Ներքգործժողկոմատը դրանք կիրառում էր կյանքում։

Որքան ավելի էր ուժեղանում ներգաղթողների հոսանքը դեպի Սովետական Հայաստան, այն-քան ավելի կատաղի ու շարանենգ զրպարտությունների էին դիմում դաշնակ գրչակներն ու

¹ Հայկական ՍՍՌ ՀՌԿՊԱ. ֆ. 178, ց. 1, գ. 975, թ. 19։

² Նույն տեղում։

³ Նույն տեղում, ֆ. 40/113, ց. 3, գ. 419, թ. 153։

⁴ Նույն տեղում, թ. 147։

⁵ Նույն տեղում, գ. 418, թ. 28։

⁶ Նույն տեղում, գ. 518, թ. 90—91 և գ. 415, թ. 13։

արտասահմանի հայկական բուրժուազիայի մյուս ձայնավորողները՝ ձգտելով ամեն կերպ խանգարել ներգաղթը, վարկարկել Սովետական Հայաստանը, ժխտել երկրում ծավալված սոցիալիստական շինարարությունը:

Բաղութահայ աշխատավորությունը, մերկացնելով իր թշնամիներին, բուռն կերպով ձգտում էր դեպի Սովետական Հայաստան՝ հակառակ նրա շուրջը հյուսվող բոլոր բարրաջանքներին ու ստոր զրպարտություններին:

Պատասխանելով այդ կարգի զրպարտիչներին, Հունաստանից Սովետական Հայաստան ներգաղթող մի խումբ աշխատավորներ 1925 թ. հունվարին գրել են. «Մեր վերջնական օթևանի՝ ՍԽՀ Միության ցավագար և անակոա թշնամիները ալ սուտ ու զրպարտություն չմնաց, որ չգրեին ու չխոսեին ներգաղթին շուրջը»:

Մենք, ներկա ստորագրեալքս, մոտ օրեն հին Հունաստանի այլևայլ վայրերեն ե. Հայաստան պիտի մեկնենք, մեր սրբազան պարտականությունը կհամարինք սույն կոչով զգուշացնել դեպի մեր պաշտած հայրենիքը մեկնողները, որ շրջան ընող շարանենգ զրույցներուն և ըսի բավներուն ընավ կարևորություն չտան...»¹:

Այնուհետև մերկացնելով դաշնակ զրպարտիչների կոնկրետ պրովոկացիաները, կոչի հեղինակները շարունակում են. «...հոն, մեր տենչալի հայրենիքի մեջ մեզի պիտի տրամադրվին հող, յժկան, դուրծիք և ատաղձ, որմն բոլորս ալ զուրկ ենք, քանի դեռ կմնանք օտար հորիզոններու տակ»:

Հայրենակիցներ՝, զգույշ և միշտ զգույշ մեր տունն ավերող և մեզ մոխրիներու վրա նստեցրնող օտար, կեղծ մարդասերներ և տարաբախտաբար հայ կոչվող խառնակիչներն, որոնք խիղձներին սպանած և ամոթի ու պատասխանատվության զգացումնին կորսնցուցած ըլլալով իսպառ, իրենց աղտոտ ձեռքերով կուզեն խառնել Ձեր խիղձին անշուրտությունը:

Ձոհ մի ըլլաք բանսարկու լեզուներու և վաճառված գրիչներու խարկանքներուն, որոնք կմիտին ձեր մեջ թշնամանքի որոմ սերմանելու՝ Վստա՜ ըլլալով, որ մոտ է այլևս մեր փրկության ժամը, կազմ ու պատրաստ եղեք դեպի Ավետյաց աշխարհը մեկնելու»²:

Չնայելով ոչ մի խոչընդոտի, զրպարտության ու պրովոկացիայի Սովետական կառավարությունը, երկրի ժողովրդական տնտեսության վերականգնման ընդգնակում ձեռք բերած հաջողություններին զուգընթաց, ավելի լայն թափով ու ծրագրված կարգով իրականացնում էր սփյուռքահայ աշխատավորների հայրենադարձությունը 1925 թ. նախօրոք մշակված պլանի համաձայն, Բաթումիի ու Զուլֆայի վրայով, արտասահմանից Հայաստան են ներգաղթել 5016 մարդ, այդ թվում Հունաստանից՝ 3651 հոգի, 1098 ընտանիք, Կ. Պոլսից՝ 781 հոգի, 201 ընտանիք, Բաղդադից և ընդհանրապես Միջագետքից՝ 385 հոգի, 160 ընտանիք: Միաժամանակ կատարվել են ներքին տեղափոխումներ ու տեղավորումներ սակավահող շրջաններից դեպի համեմատաբար հողառատ վայրերը³:

Նախատեսված էր ներգաղթողներին տեղավորել Արաղդայանում, և Ժողկոմխորհի որոշմամբ այդ նպատակով ստեղծվել էր Արաղդայանի ներգաղթի հանձնաժողովը, որը և կատարում էր բոլոր ընթացիկ աշխատանքները:

1925 թ. ներգաղթողների մի զգալի մասը Հայաստան է ժամանում ուշ աշնանը՝ նոյեմբերին, ի մասը, որպես արհեստավորներ ու բանվորներ, բնակություն են հաստատում Երևան, Լենինական քաղաքներում ու այլ վայրերում, իսկ մոտ 1500 հողագործներ տեղավորվում են Արաղդայանում: Շուտափույթ կարգով վերջիններիս համար կառուցվում են փայտյա ժամանակավոր տներ, բաղնիք, հիվանդանոց, դպրոց, արհեստանոց, խանութ և այլն:

Հայրենադարձների զգալի մասը չքավորներ ու որբեր էին և, բնականաբար, նյութական օգնության կարիք էին զգում, ուստի Ժողկոմխորհին առերթեր Աշխատավորական ներգաղթի հանձնաժողովի որոշմամբ ավելի քան 500 հոգի սնվում էին պետության հաշվին, իսկ մյուս մասին էժան գներով տրվում էր հաց և այլ մթերքներ⁴: Ներգաղթածների համար 1926 թ. դարնանք Արաղդայանի շրջանում հիմնադրվում են 4 գյուղեր, հատկացվում հողաբաժիններ, սերմացու և վարկ՝ իրենց սեփական տնտեսությունն ստեղծելու համար: Նորակառույց չորս գյուղերն

¹ Հայկական ՍՍԽՀ ՆԽԿՊԱ, ֆ. 40 113, ց. 3, գ. 496, թ. 46:

² Նույն տեղում:

³ Նույն տեղում, գ. 377, թ. 3 և գ. 496, թ. 19:

⁴ Հայկական ՍՍԽՀ ՆԽԿՊԱ, ֆ. 30 116, ց. 1, գ. 335, թ. 121—122:

էին՝ Արագդայանը, որտեղ տեղավորվեցին 99 ընտանիք՝ 290 մարդ, Արմաշը՝ 114 ընտանիք՝ 324 մարդ, Սուրենավանը՝ 34 ընտանիք՝ 112 մարդ և Սմոն՝ 47 ընտանիք՝ 172 մարդ¹։

Առաջին գարնանը նրանց հողերը հերկվում են սլետական միջոցներով կամ վարկային սկզբունքներով։ Չորս գյուղերում վարվել է 397 գեսյատին տարածություն, որից 235 գեսյատինը Գյուղբանկի միջոցով, 65 գեսյատինը՝ Արագդայանի աշխատավորական ներգաղթի հանձնաժողովի կողմից և 97 գեսյատինը՝ Դավալուի վարկային ընկերության կողմից։ Միաժամանակ նրանց տրվել են գյուղատնտեսական գործիքներ, բամբակի, բանջարեղենի սերմեր և այլն. դա երեւում է հետևյալ աղյուսակից²։

Գյուղերի անունները	Գարի	Եղիպ- տացո- րեն	Ոչ- խառ- ններ	Գառ- ններ	Դուռ- յիներ	Թոր- խիներ	Թիեր և կո- թեր	Բան- կեր և կո- թեր
Արագդայան	8820 փ.	31փ 15ֆ	121	121	88	75	84—84	44—100
Արմաշ . . .	6562 փ.	36փ	142	142	124	167	106—112	98—27
Սվչար . . .	368 փ.	14փ 15ֆ	47	47	39	57	8—	45—25
Սմոն . . .	—	9փ 35ֆ	—	—	45	47	28—29	43—48
Ընդամենը	15,750փ	90փ 65ֆ	310	310	296	286	226 225	230—209

Վերահիշյալից բացի՝ այդ չորս գյուղերում բնակություն հաստատած ներգաղթած տնտեսու-
թյունները ստացել են նաև 50 զույգ եզ, 60 լուծ, 60 կամ, 20 գութան, 394 մանգաղ, 294 գե-
րանդի, 75 փոցի, 30 զնգան, 20 սայլ և այլն³։

Ներգաղթածները 1926 թ. գարնանը ցանել էին 83 գեսյատին գարի, 123,5 գեսյատին բամ-
բակ, մոտ 39 գեսյատին բանջարանոցային կուլտուրաներ, 21 գեսյատին խոտարույսեր, 27,5
գեսյատին եգիպտացորեն և այլն⁴։ Տեղի բնակչիմայական պայմաններին անդանոթ ներգաղթած-
ներին օգնելու համար Հոյժողկոմատը նրանց մոտ է ուղարկում մասնագետ գյուղատնտեսներ
Արագդայանի շրջանում տեղավորված ներգաղթածներին հատկացված հողամասերը ջրով ապա-
հովելու համար Ջրային տնտեսության կողմից վերանորոգվում է նախկին «Կախանովի» ջրանց-
յր և Արաքսից խմելու ջուր է մատակարարվում։ Պիտանի հողամասերի տարածությունն ընդար-
ձակելու նպատակով Սուրենավան և Արմաշ գյուղերի շուրջը ջրհան մեքենայով ոռոգելի է
դարձվում 150 գեսյատին հողամաս։ Քանի որ ներգաղթածների մեջ կային հմուտ ծխախոտա-
գործներ, իսկ ծխախոտի մշակությունը Հայաստանում ուներ մեծ հեռանկարներ, Արմաշ գյու-
ղում կազմակերպվում է ծխախոտագործների մի կոոպերատիվ միություն, բաղկացած 57 տնտե-
սությունից։ Ծխախոտի մշակությամբ էին զբաղվում նաև մի քանի մասնավոր տնտեսություն-
ներ՝ ուրիշ գյուղերում⁵։

1925 թ. ընթացքում ներգաղթած բնակչության համար մինչ 1926 թ. կեսերը կատարվում է
հսկայական շինարարական աշխատանք։ Արագդայան գյուղում կառուցվում է 12 նոր տուն և
վերանորոգվում նախկին Շերեմետևի ընկերության գործարանից 63 սենյակ, ուր տեղավորվում
են 93 տնտեսություն՝ 271 շնչով։ Արմաշում կառուցվում է 34 շենք, որտեղ բնակություն են հաս-
տատում 104 տնտեսություն՝ 311 բնակիչներով։ Ավշար գյուղում կառուցվում է 12 շենք՝ 35 բն-
տանիքի համար, որոնց անդամների թիվը հասնում էր 112 մարդու։ Սմոն ներգաղթած բնակիչ-
ները իրենց տրամադրված շինանյութերով վերանորոգում են քանդված նախկին շենքերը, ուր
տեղավորվում են 47 ընտանիք, 172 շնչով⁵։

¹ Նույն տեղում, ֆ. 123, ց. 1, գ. 1576, թ. 13—15։

² Նույն տեղում, ֆ. 30/116, ց. 1, գ. 333, թ. 121—127։

³ Նույն տեղում։

⁴ Նույն տեղում։

⁵ Հայկական ՍՍԽ ՀՌԿՊԱ, ֆ. 30/116, ց. 1, գ. 333, թ. 121—127։

Ներգաղթի կազմակերպման, ներգաղթողների տեղափոխման, տեղավորման և այդ կապակցությամբ կատարվող մյուս աշխատանքները պահանջում էին նյութական հսկայական միջոցներ։ Սովետական Հայաստանի կառավարությունը իր բյուջեից միշտ էլ զգալի մասհանումներ է կատարել այդ նպատակի համար։

1923 թ. ընթացքում ներգաղթած 953 հոգու համար ՀՍԽՀ ներքոործողկոմատի գաղթականական բաժնի կողմից ծախսվել է 22 500 ռուբլի ոսկով, կամ 246 միլիարդ 798 միլիոն ռուբլի Անգրֆեդերացիայի դրամանիշներով¹, չհաշված հացահատիկով և այլ պարենամթերքներով նրանց ցույց տրված օժանդակությունը։ 1925 թ. ներգաղթածների կարիքները հոգալու նպատակով, ըստ կազմված նախահաշվի, ծախսված գումարը կազմել է 418 250 ռուբլի²։

Ներգաղթի և բնակեցման գծով վարկավորվողները բաժանվում էին երեք խմբի։ Առաջին խումբը արտասահմանից և այլ ռեսպուբլիկաներից ներգաղթողներն էին, երկրորդ խումբը՝ երկրի ներսում մի տեղից մի այլ վայր տեղափոխվող գաղթականները, որոնք նոր բնակավայրում չունեին բնակարաններ ու գյուղատնտեսական գործիքներ և, վերջապես, երրորդ խումբը այն գաղթականներն էին, որոնք չնայած բավարարված էին հողամասերով, բայց գտնվում էին ծայրահեղ շրջավորության մեջ և բնակարան չունեին։

Չորս հոգուց բաղկացած մեկ բնտանիքի համար ըստ խմբերի սահմանված էր վարկի հետևյալ չափը³։

Ըստ խմբերի	Վ ա Ր Կ ե Ր Ի գ ու մ ա Ր Ը					
	գույքամորման	շինարարական	նոր բնակավայրում 4 ամիս սնունդով ապահովելու համար	տեղափոխման	բժշկ. օգ.	ընդամենը
1-ին խումբ	310 ռ.	400 ռ.	52 ռ. 50 կ.	18 ռ.	7 ռ. 50 կ.	788 ռ.
2-րդ խումբ	110 ռ.	200 ռ.	—	6 ռ.	—	316 ռ.
3-րդ խումբ	—	200 ռ.	—	—	—	200 ռ.

Արտասահմանից և այլ վայրերից ներգաղթողները, ինչպես երևում է վերը բերած աղյուսակից, ստանում էին անհրաժեշտ միջոցներ՝ բնակելի տներով, գյուղատնտեսական գործիքներով և այլ պարագաներով ապահովվելու համար։ Երեք խմբերի համար աղյուսակում ցույց տրված սննդի, բժշկական օգնության և տեղափոխման ծախսերը հաշվվում են անվերադարձ գումարներ։ Գույքավորման և շինարարական վարկերը տրվում էին երկարատև և նպաստավոր պայմաններով, այն է՝ գույքավորմանը՝ 6 և շինարարականը՝ 10 տարի ժամկետով։ Արտասահմանից ներգաղթողները և նոր գյուղերում հաստատվողները, համաձայն Կենտգործկոմի 1925 թ. հունվարի որոշման, առնվազն 3 տարի ազատվում էին ամեն տեսակ հարկերից⁴։ Սովետական Հայաստան ներգաղթած բանվորները, արհեստավորներն ու այլ մասնագետները նույնպես հնարավորություն էին ստանում վայելելու ազատ աշխատանքի պտուղները։ Նրանց ևս ընձեռվում էին համապատասխան արտոնություններ, ապահովվում էին աշխատանքով առաջին հերթին, ստանում էին վարկ և այլն։

Սովետական կառավարության ամենօրյա հոգատարությունը կարճ ժամանակամիջոցում գաղթականության տնտեսական վիճակի բարելավման իսկական երաշխիքն էր։

Հայրենադարձների շնորհիվ Սովետական Հայաստանի ժողովրդական տնտեսությունը ձեռք էր բերում հմուտ ու առաջնակարգ մասնագետներ, որովհետև ներգաղթածների մեծ մասը որակյալ բանվորներ ու արհեստավորներ էին, իսկ մի զգալի մասն էլ՝ թանկարժեք կուլտուրաների մշակման առաջնակարգ մասնագետներ։

¹ Նույն տեղում, ֆ. 112, ց. 1, գ. 1490, թ. 21։

² Նույն տեղում, ֆ. 123, ց. 1, գ. 1576, թ. 13—15։

³ Նույն տեղում։

⁴ Նույն տեղում։

Սփյուռքահայ աշխատավորները Հայաստան տեղափոխվելուց հետո, զգալով Սովետական կառավարության ջերմ վերաբերմունքն իրենց նկատմամբ, երախտագիտությամբ լի, անմիջապես լծվում էին շինարար աշխատանքի և ջանում կարճ ժամանակամիջոցում վերականգնել ավերված օջախները իրենց նոր, Հահագործումից ու ստրկությունից ազատագրված սոցիալիստական հայրենիքում, միաժամանակ կոչ անում իրենց նախկին բախտակիցներին նույնպես վերադառնալ Սովետական Հայաստան:

Ահա այդ երախտագիտության վառ վկայություններից մեկը, որ արտահայտել են 1924 թ. հունիսի 4. Պոլսից հայրենիք ներգաղթած մի խումբ աշխատավորներ արտասահմանի իրենց վտարանդի եղբայրներին ուղղված նամակներից մեկում.

«Բռնակալ կապիտալիստների երկրներում երկար թափառումներից հետո վերջապես հասանք Խորհրդային Միության սահմանները և Բաթումի ճամփով անցանք Խորհրդային Հայաստան: Այն մարդավայել վերաբերմունքը, որ մենք վայելեցինք Խորհրդային երկրում ընդհանրապես, և այն ջերմ, սիրալիք ընդունելությունն ու հոգատար վերաբերմունքը, որ իր սուղ միջոցներով մեզ ցույց տվեց մասնավորապես Խորհրդային Հայաստանը, մեզ միանգամայն հիացրեց և մենք զգացված՝ մեր անկեղծ երախտագիտական շնորհակալությունն ենք հայտնում Խորհրդային Հայաստանի կառավարությանը, հայտնելով մեր պատրաստակամությունը՝ բովանդակ ուժերով լծվելու նրա ձեռնարկած կուլտուր-շինարարական աշխատանքներին:

Թող լսեն օտար երկրներում թափառող մեր աստանդական սղբայրները, որ միայն և միայն Խորհրդային Հայաստանում վերջ գտան մեր տառապանքները, և մենք տեսանք մարդկային, ընկերական վերաբերմունք, որին մինչև այժմ այնքան ծարավի էինք: Այստեղ միայն զնահատվեց մեր աշխատանքը և կարելիություն տրվեց լծվելու շինարարության հսկա գործին, որը ղեկավարում է Խորհրդային կառավարությունը Հայաստանի աշխատավորության աջակցությամբ:

Այսպիսով, Սովետական Հայաստանի կառավարությունը, Հայաստանի կոմունիստական պարտիան, ՍՍՄԿ և Անդրֆեդերացիայի կառավարությունների ամենալայն աջակցությամբ ոչ օգնությամբ, 1921—1925 թթ. իրականացրին սփյուռքահայ հազարավոր աշխատավորների հայրենիք վերադառնալու նվիրական իղձերը: Բազմաթիվ աղբյուրների համադրման միջոցով մենք փորձել ենք զեթ մոտավոր հաշվարկման ենթարկել 1921—1925 թթ. ընթացքում արտասահմանից Սովետական Հայաստան ներգաղթածների բանակը և կազմել ուտորև բերված աղյուսակը²:

Տարեթիվ	Որտեղից են ներգաղթել	Տեսնեսու- թյունների բանակը	Ներգաղթած- ների բանակը
1921	Գրավոր ստույգ տվյալներ չեն պահպանվել	—	—
1922	Միջադեպից, Պարսկաստանից, Կ. Պոլսից և այլ տեղերից	2001	2552
1923	Վանից և այլ վայրերից	258	953
1924	Հունաստանից, Կ. Պոլսից, Սիրիայից և այլ երկրներից	783	4167
1925	Հունաստանից, Կ. Պոլսից, Միջադեպից և այլ վայրերից	1459	5016
Ընդամենը		4501 տնտ.	19,688 հոգի

Իրականում 1921—1925 թթ. ընթացքում Հայաստան ներգաղթածների թիվը շատ ավելին է, քան ցույց է տրված այս աղյուսակում:

1922 թ. հոկտեմբերին ՀՍԽՀ կենտրոնական կողմից կազմված մի տեղեկանքում նշված է, որ 1921 թ. մայիսից մինչև 1922 թ. մայիսն ընկած ժամանակամիջոցում (իսկ փաստորեն 1921 թ.

¹ «Խորհրդային Հայաստան», 7 հոկտեմբերի, 1924, № 229:

² Տե՛ս Հայկական ՍՍԽՀ ՆԻԿՊՈՒ, ֆ. 40/113, ց. 3, գ. 377, թ. 3, գ. 491, թ. 7 և 33—35, գ. 518, թ. 10, ֆ. 123, ց. 1, գ. 1640, թ. 31—35, ֆ. 30/116, ց. 1, գ. 335, թ. 121—127 և գ. 2352, թ. 19—28:

Հմմտ. նաև՝ «Խորհրդային Հայաստան—1921—1925 թթ.», ժողովածու, Երևան, 1926, էջ 69 և հոգ. 5. Հակոբյան, Խորհրդային Հայաստան (տպավորություններ և ուսումնասիրություններ), Փարիզ, 1929, էջ 253:

րնթացքում), Հայաստան են վերադարձել ավելի քան 247 000 գաղթականներ, որից 150 000՝ հայեր, ասորիներ ու եզդիներ, 97 000՝ մահմեդականներ, այսինքն ազրերեղանցիներ¹։

Աղյուսակի թվերի մեջ տեղ չեն գտել սովետական մյուս ռեսպուբլիկաներից Հայաստան տեղափոխվածները, որոնց քանակը փոքր չէր այդ տարիներին։ Այնուհետև, երբեմն հաշվառման չեն ներթափանցում և ներգաղթողների բերված աղյուսակի թվերի մեջ չեն մտել նաև այդ տարիներին արտասահմանից Սովետական Հայաստան եկած շատ առանձին ընտանիքներ, փոքրիկ խմբեր ու անհատ անձնավորություններ²։

Այսպիսով, Սովետական կառավարությունը, 1921—1925 թթ. երկրի ժողովրդական տնտեսության վերականգնմանը զուգընթաց, արտակարգ հոգատարություն և ուշադրություն է ցուցաբերել նաև երկրում կուտակված գաղթականության ու սփյուռքահայ աշխատավորների բախտի նկատմամբ, առաջինների հարցի լուծման հետ միաժամանակ կազմակերպելով վերջիններիս առավել դժվարին կացության մեջ գտնվող մասի ներգաղթը դեպի հայրենիք, ուր նրանք լայն հնարավորություններ ստացան բոլոր ամենայնի կարճ ժամանակամիջոցում վերստեղծելու իրենց սեփական տնտեսությունները։

Նույնով ՀՍԽՍՀ Ժողկոմիտեի կողմից կազմվում է գաղթականության տեղավորման միջոցառումների հնգամյա հեռանկարային ընդարձակ պլան, որը լիովին ու վերջնականապես կրթելավեր հայրենադարձների տնտեսական դրությունը և խսպոռ կվերացնեն «գաղթական» անունը սոցիալիզմի ուղին թևակոխած Սովետական Հայաստանի տասնյակ հազարավոր լիիրավ ու ազատ քաղաքացիների վրայից³։

Ահա թե ինչու գաղութահայ աշխատավորները է՛լ ավելի բուռն կերպով ձգտում էին տեղափոխվել Սովետական Հայաստան։ Այդ տարիներին սկիզբ է առնում սփյուռքահայության ամենախրախուսելի շարժումը՝ ամբողջ հայրենակցական միություններով Հայաստան ներգաղթելու նշանաբանով։ Այդպիսի ցանկություններով ՀՍԽՍՀ Ժողկոմիտեին էին դիմում բազմաթիվ հայրենակցական միություններ, որոնք և 1925 թ. սկսած ու ավելի լայն թափով 30-ական թվականներին Սովետական Հայաստանում «նոր» մասնիկի կցումով հիմնեցին իրենց ծննդավայրերի անունով հայրենադարձների բազմաթիվ գեղեցիկ ավաններ։

Այսպիսով, իր գոյության առաջին իսկ օրերից, Սովետական Հայաստանը դարձավ համայն հայ աշխատավորների իսկական օրրանը, այն հանգրվանը, որտեղ հետագա տարիներին է՛լ ավելի մեծ թվով սփյուռքահայեր վերջնականապես գերեզմանեցին գաղթականի իրենց անիծյալ ցուպը և դարձան սոցիալիստական շինարարության ակտիվ մասնակիցներ, Հայկական Սովետական Սոցիալիստական Ռեսպուբլիկայի լիիրավ քաղաքացիներ։

РЕПАТРИАЦИЯ ЗАРУБЕЖНЫХ АРМЯН В СОВЕТСКУЮ АРМЕНИЮ

(1921—1925)

О. У. МЕЛИКСЕТЯН

(Р е з ю м е)

В статье на конкретных примерах показано, как правительство Советской Армении с помощью Советской России и других братских республик вместе с восстановлением народного хозяйства страны постепенно разрешало вопрос беженцев: обеспечивало их жильем, землей, сельскохозяйственными орудиями и т. д. После нормализации жизни беженцев, находившихся в Армении, Советское правительство стало непосредственно заниматься вопросом репатриации армян на родину из-за рубежа.

В статье отражено усиление симпатии зарубежных трудящихся-армян к Советской Армении, приводятся их многочисленные письма с выражением желания возвратиться на родину. Советское правительство, идя навстречу этим патриотическим стремлениям, с конца 1921 года по 1925 год осуществило репатриацию из Турции, Греции, Месопотамии, Сирии, Франции и других стран более 20 тысяч трудящихся-армян, которым были предоставлены особые льготы, созданы условия для мирной, созидательной жизни. На родной, свободной земле армяне-репатрианты вместе со всеми трудящимися республики активно включились в социалистическое строительство.

¹ Տե՛ս Հայկական ՍՍԻՀ ՀԻԿՊԱ, ֆ. 112, ց. 1, գ. 8, թ. 135։

² Տե՛ս «Ներհան», Փարիզ, 24 հուլիսի 1929, № 534։

³ Հայկական ՍՍԻՀ ՀԻԿՊԱ, ֆ. 112, ց. 1, գ. 318։